

Festival di Tumba Curaçao lo bay celebra su di 10 añ den un forma espectacular..

** Ayera den e luhoso Havana Beach Club a tuma lugar e rueda di prensa pa loke ta trata e Festival di Tumba di hermana isla Corsow, na unda miembronan di direc-

Debi cu Elgin Juddan a falta respet contra su persona..

Ramphis Tromp lo no participa den ningun Festival...



** Aki tabata e momento cu Ramphis Tromp a confirma su participacion den e Festival di Tumba na Corsow, cual a tuma lugar ayera durante e rueda di prensa cu Asosiation di Musico y Artista Corsow a tene den Havana Beach Club..

** Ayera durante e rueda di prensa, DEN AMBIENTE a combersa cu Ramphis Tromp, kende a confirma DEN AMBIENTE cu e añ aki el a dicidi pa bolbe bay participa den e Festival di Tumba na Corsow, na unda e ta mira esaki como un bon promocion pa tanto su persona como su banda musical EQO.

Tambe Ramphis Tromp a confirma DEN AMBIENTE cu e no lo participa den e festival di Tumba aki na Aruba y tambe den e festival di Calypso & Roadmarch. Esaki ta debi cu e no ta contento pa e forma con Sr. Elgin Juddan presidente di ASOMA a hasi un declaracion na su persona.

Pa su persona e declaracion aki di bisa otro hende pa bin bise cu e mester bay un les di

canto, ta algo cu e no ta acepta y ta considera esaki como un desprecio y falta di respet na su persona como miembro di ASOMA. Simplemente e declaracion aki no a cay na su agrado, muy enparticular e forma con Elgin Juddan a expresa esaki, cual pa su persona no ta un conseho, pero un forma pa rebaha su persona.

Mas aleu Ramphis Tromp a declara na DEN AMBIENTE cu tog e ta contribui cu e festival di Tumba, cu su aporte como compositor pa Melvin Garcia, Guy Raven, Carolyn Kelly y Elton Kelly.

Porcierto mayan diadomingo Ramphis Tromp lo viaha pa Corsow, na unda e lo bay inscribi su nomber como participante pa e festival di Tumba..



tiva di Asosiation di Musico y Artista Corsow tabata presente den persona di Sr. Manfred "Feco" Gomez (presidente), Sr. Ernest "Keke" Willems (secretario), Sr. Ramon Penzo (Consehero General) y Sr. Pietje Pieterne (Asesor administrativo).

E delegacion aki tabata huesped di Sr. Anthony Muyaale di Havana Beach Club y Sr. Michael Profeet di Caribbean Town Beach Resort, kendenan a brinda e delegacion un tremendo trato. Tambe durante e rueda di prensa aki tabata presente e representante di AIR ALM, Sra. Lis Lampe y como tal tambe Sr. Tirso Tromp di Amstel Beer.

E rueda di prensa aki a ser bon atende pa e medionan di comunicacion mas importante di nos pais y hasta tabatin diferente radio emisoran cu a transmiti esaki enbibo manera entre otro: Magic, Galactica y Canal 90.

Un biaha mas Asosiation di Musico y Artista di Corsow a luci tremendamente pa nan forma bon organiza pa asina bende nan magno producto "Festival di Tumba" aki na Aruba, cual ta ser concidera como e evento cultural mas importante di Corsow.

Durante e rueda di prensa aki por a compronde cu e interes pa transmiti Festival di Tumba 1999 ta hopi grandi. Di Aruba lo tin transmision di cuater radio emisor, Canal 90, Magic, Galactica y Top 95 fm, di Corsow lo tin 8 radio emisor, mientras cu di St. Maarten y Hulanda tambe lo tin un radio emisor. Tele Curaçao lo transmiti e final di Festival di Tumba di un forma exclusivo.

E añ aki Festival di Tumba lo haya promoshon extra na Radio, TV y Corant pa medio di posternan. Manera a bira un tradicion tambe lo promove e Festival di Tumba aki na Aruba, Bonaire, mientras lo hasi posibel via oficina di turismo CTDB pa promove e espectáculo aki internacionalmente.

Un di e prome actividadnan cu ta di gran importancia durante actividadnan di Tumba y cu ta cuminsa pone tur

hende sinti keintura di Carnaval ta inscripshon di Festival di Tumba. Esaki lo bay tuma lugar diadomingo 17 januari esta mayan pa 1'or di merdia den Curaçao Festival Center, na unda Diputado di Cultura Drs. Magda Rafael ta duna inicio oficial di inscripshon. Pa 6'or di atardi Gezaghebber Mr. Stanley Bertain lo declara e inscripshon oficialmente sera. Manera ya a bira e customber, lo tin transmision directo di tur local cu ta sosede riba e dianan aki pa medio di tur radio emisoran local, Aruba y St. Maarten. Ademas lo tin musica live pa deleita tur esnan presente. Tambe Tele Curaçao lo transmiti e dia aki di un forma directo.

Dianan 25, 26 y 27 di januari, ta e dianan preliminar di Festival di Tumba 1999. E programa ta cuminsa 8'or enpunto cu himno di Corsow. Diarason 27 di januari, despues cu e ultimo grupo duna su presentacion oficial, nan mester keda riba tarima pa deleita te ora cu Presidente di Hurado trese e lista di finalistanan.

Diabierne 29 di januari lo ta e dia di gran final. Pa 7'or di anochi lo tin un mini conferencia di prensa, pa duna informacion di e programacion di e anochi y informacion relevante na participantenan. E biaha aki e final lo conta cu 25 participante. Pa 8'or di anochi e programa ta start oficialmente cu discursio di Presidente di Asosiation di Musico y Himno di Corsow.

Algo nobo cu e añ aki Asosiation di Musico y Artista Corsow a trese pa dilanti, ta cu huradonan lo pone hopi enfasis riba e Tumba cu ta contene mas ambiente riba caya. Hurado ta cay directamente bao di presidente di Asosiation di Musico y Artista Sr. Feco Gomes, Sr. Ernest Willems secretario y Consehero General di Asosiation Sr. Ramon Penzo asisti pa Sr. Frank Girigori y Sr. Stanley Gijsbertha. Mientras e cuerpo ehecutivo di hurado ta consisti di e presidente di Hurado Sr. Mr. Carl Camelia asisti pa Vice Presidente y un secretario, prosedado di dato-

nan y atministrado di tempo. E compania Moret, Ernst & Young lo ta encarga cu e parti di control y revision di datonan.

Algo nobo tambe cu e añ aki Asosiation di Musico y Artista a introduci ta cu tur benta di e caarchinan ta den man di Posterij NV. Tambe compara cu añanan anterior lo tin un cambio den preis di entrada pa pakete: Seccion General Fl.60,- pa package pa persona. Red Carpet Fl.215,- pa package pa persona. Lo bay tin dilanti tarima e seccion di Musiconan, Red Carpet y Seccion A pa invitatadonan. Tin un cantidad limita pa e anochinan preliminar na rason di Fl. 20,-. Tur seccion ta bon indica y ta pidi tur bishitante pa semper tene nan carnet of badge of tambe mitar caarchi cumpra cu nan.

E añ un biaha mas e magno Festival di Tumba Curaçao 1999, ta bay conta cu apoyo di varios patrocinadonan potencial di Corsow, kendenan durante tur e anochinan di e festival, lo bay duna doorprizenan hopi atractivo, cual sigur lo bay cay na agrado serca e publico.

E di 10 edishon di Festival di Tumba lo bay ser dedica na e tres valuarte musiconan: Wilfrido Valeriaan, Manfred "Manichi" Curiel y Fortunato Van Aanholt.

Tambe durante e rueda di prensa aki, e representante di AIR ALM, Sra. Lis Lampe a duna di conoce cu AIR ALM como un di e patrocinadonan principal di e festival aki, a programa riba diabierna cual ta e gran dia final di e festival dos avion MD extra. Tambe nan a forma un package cu diferente hotelnan pa un anochi di estadia, specialmente pa tur esnan cu kier regresa Aruba diasabra pa asina tambe disfruta di e Festival di Calypso & Roadmarch.

Mientrastanto mester bisa cu e entusiasmo pa e festival aki ta hopi grandi na Corsow y tur cos ta muestra cu Asosiation di Musico y Artista y henter pueblo di Corsow, sin duda algun lo bay goza di un otro exitoso FESTIVAL DI TUMBA..